

四庫全書

史部

欽定四庫全書

舊五代史卷一百四十三

宋門下侍郎參知政事監修國史薛居正等撰

志五

禮志下

後唐長興元年九月太常禮院奏來年四月孟夏禘饗
于太廟謹按禮經三年一禘以孟冬五年一祫以孟夏
已毀未毀之主並合食于太廟之廟逐廟功臣配饗于

本朝之庭本朝寶應元年定禮奉景皇帝高祖太宗為始封之祖既廟號太祖百代不遷每遇禘祫位居東向之尊自代祖元皇帝高祖太宗已下列聖子孫各序昭穆南北相向合食于前聖朝中興重修宗廟今太廟見饗高祖太宗懿宗昭宗獻祖太祖莊宗七廟太祖景皇帝在祧廟之數不列廟饗將來禘禮若奉高祖居東向之尊則禘饗不及于太祖代祖若以祧廟太祖居東向之位則又違于禮意今所司修奉祧廟神主及諸色法

物已備合預請參請事須具狀申奏勅下尚書省集百官詳議戶部尚書韓彥輝等奏議曰伏以本朝尊受命之祖景皇帝為始封之君百代不遷長居廟食自貞觀至于天祐無所改更聖祖神孫左昭右穆自中興國祚再議宗祊以太祖景皇帝在祧廟之數不列祖宗欲尊太祖之位將行東向之儀爰命羣臣同議可否伏詳本朝列聖之舊典明皇定禮之新規開元十年特立九廟子孫遵守歷代無虧今既行定禮之規又以祧太祖之

室昔德宗朝將行禘祫之禮顏真卿議請奉獻祖居東向之位景皇帝暫居昭穆之列考之于貞元則以為誤行之于今日正得其禮今欲請每遇禘祫之歲暫奉景皇帝居東向之尊自元皇帝以下敘列昭穆從之

周廣順三年冬十月禮儀使奏郊廟祝文禮例云古者文字皆書于冊而有長短之差魏晉郊廟祝文書于冊唐初悉用祝版唯陵廟用玉冊玄宗親祭郊廟用玉為冊德宗朝博士陸淳議准禮用祝版祭已燔之可其議

貞元六年親祭又用竹冊當司准開元禮並用祝版梁
朝依禮行之至明宗郊天又用竹冊今詳酌禮例祝版
為宜從之 周廣順三年九月南郊禮儀使奉郊祀所
用珪璧制度准禮祀上帝以蒼璧祀地祇以黃琮祀五
帝以珪璋琥璜其玉各依本方正色祀日月以珪璋祀
神州以兩珪有邸其用幣天以蒼色地以黃色配帝以
白色日月五帝各從本方之色皆長一丈八尺其珪璧
之狀璧圓而琮八方珪上銳而下方半珪曰璋琥為虎

形半璧曰璜其珪璧琮璜皆長一尺二寸四珪有卽卽本也珪著于璧而整肅也日月星辰以珪璧五寸前件珪璧雖有圖樣而長短之說或殊按唐開元中玄宗詔曰祀神以玉取其精潔比來用珉不可行也如或以玉難辦寧小其制度以取其真今郊廟所修珪璧量玉大小不必皆從古制伏請下所司修制從之顯德四年夏四月禮官博士等准詔議祭器祭玉制度以聞時國子祭酒尹拙引崔靈恩三禮義宗云蒼璧所以祀天其長

十二二寸蓋法天之十二時又引江都集白虎通等諸書所說云璧皆外圓內方又云璜琮所以祀地其長十寸以法地之數其琮外方內圓其徑九寸又按院氏鄭玄圓皆云九寸周禮玉人職又有九寸之璧及引爾雅云肉倍好謂之璧好倍肉謂之瑗肉好若一謂之環郭璞注云好孔也肉邊也而不載尺寸之數崇義又引各官玉人云璧好三寸爾雅云肉倍好謂之璧兩邊肉各三寸通好共九寸則其璧九寸明矣崇義又云璜琮八

方以象地每角各刻出一寸六分共長八寸厚一寸按周禮疏及阮氏圖並無好又引冬官玉人云琮八角而無好崇義又云琮璜珪璧俱是祀天地之器而爾雅唯言璧環璜三者有好其餘璜琮諸器並不言之則璜琮八角而無好明矣太常卿田敏以下議以為尹拙所說雖有所據而崇義援周禮正文其理稍優請從之其諸祭器制度亦多以崇義所議為定 顯德二年秋八月兵部尚書張昭上言今月十二日伏蒙宸慈召對面奉

聖旨每年祭祀多用太牢念其耕稼之勞更備犧牲之用比諸黍養特可愍傷令臣等討故事可以侔牲代否臣仰稟綸言退尋禮籍其三牲八簋之制五禮六樂之文著在典彛迭相沿襲累經朝代無所改更臣聞古者燔黍捭豚尚多質略近則梁武麪牲竹脯不可宗師雖好生之德則然于奉先之儀太劣蓋禮主于信孝本因心黍稷非馨鬼神饗德不必牲牢之巨細籩豆之方圓苟血祀長保于宗祧而牲俎何須于繭栗但以國之大

事儒者久行易以佗牢恐未為便以臣愚見其南北郊宗廟社稷朝夕月等大祠如皇帝親行事備三牲如有司攝行事則用少牢已下雖非舊典貴減牲牛是時太常卿田敏又奏云臣奉聖旨為祭用犢事今太僕寺供犢一年四季都用犢二十二頭唐會要武德九年十月詔祭祀之意本以為民窮民事神有乖正直殺牛不如酌祭明德即是馨香望古推今民神一揆其祭園丘方澤宗廟已外並可止用少牢用少牢者用特牲代時

和年豐然後克修常禮又按會要天寶六載正月十三日赦文祭祀之典犧牲所備將有違于虔誠蓋不資于廣殺自今後每大祭祀應用騂犢宜令所司量減其數仍永為恒式其年起請以舊料每年用犢二百一十二頭今請減一百六十三頭止用三十九頭餘祠饗並停用犢至上元二年九月二十一日赦文國之大事郊祀為先貴其至誠不美多品黍稷雖設猶或非馨牲牢空多未為能饗園丘方澤任依恒式宗廟諸祠臨時獻熟

用懷明德之馨庶合西隣之祭其年起請昊天上帝太廟各太牢一餘祭並隨事市供若據天寶六載自二百一十二頭減用三十九頭據武德九年每年用犢十頭國丘方澤一宗廟五據上元二年起請祇昊天上帝太廟又無方澤則九頭矣今國家用牛比開元天寶則不多比武德上元則過其大半案會要太僕寺有牧監掌孳課之事乞今後太僕寺養孳課牛其犢遇祭昊天前三月養之滌宮取其蕩滌清潔餘祭則不養滌宮若臨

時買牛恐非典故奉勅祭祀尚誠祝史貴誠非誠與信
何以事神祢祭重于殺牛黍稷輕于明德犧牲之數具
載典經前代以來或有增損宜採酌中之禮且從貴少
之丈起今後祭園丘方澤社稷並依舊用犢其太廟及
諸祠宜准上元二年九月二十一日制並不用犢如皇
帝親行事則依常式

後唐同光二年三月十日祠部奏本朝舊儀太微宮每
年五薦獻其南郊壇每年四祠祭吏部申奏請差中書

問下攝太尉行事其太廟及諸郊壇並吏部差三品已上攝太尉行事從之至其年七月中書門下奏據尚書祠部狀每年太尉宮五薦獻南郊壇四祠祭並宰相攝太尉行事惟太廟時祭獨遣庶僚雖為舊規慮成闕禮臣等商量今後太廟祠祭亦望差宰臣行事從之 三

年十一月禮儀使奏伏准禮經喪三年不祭天地社稷為越紼行事此古制也爰自漢文益尊神器務徇公絕私之義行以日易月之制事久相沿禮從順變今園陵

已畢祥練既除宗廟不可以乏之神祇不可以廢祀宜遵禮意式展孝思伏請自貞簡太后升祔禮畢應宗廟使樂及羣祀並准舊施行從之 天成四年九月太常寺奏伏見大祠則差宰臣行事中祠則差諸寺卿監行事小祠則委太祝奉禮今後凡小祠請差五品官行事從之 其年十月中書門下奏太微宮太廟南郊壇宰臣行事宿齋百官皆預人事伏以奉命行事精誠齋宿儻徧見于朝官涉不處于祠祭今後宰臣行事文武兩

班望令並不得到宿齋處者奉勅宜依 其年十二月
書中門下奏今後宰臣致齋內請不押班不知印不起
居或遇國忌應行事官受誓戒並不赴行香並不奏覆
刑殺公事及大祠致齋內請不開宴從之 長興二年
五月尚書左丞崔儉奏大祠差官行事皇帝雖不預祭
其日亦不視朝伏見駕駕其日或出于理不便今後請
每遇大祀中祀車駕不出從之 四年二月太常博士
路航奏比來小祠已上公卿皆著祭服行事近日唯郊

廟太微宮具祭服五郊迎氣日月諸祠並祇常服行事
兼本司執事人等皆著隨事衣裝狼籍鞋履便隨公卿
升降于壇墀按祠部令中祠以上應齋郎等升壇行事
者並給潔服事畢收納今後中祠已上公卿請具祭服
執事升壇人並着具緋衣幘子又臣檢禮閣新儀太微
宮使卯時行事近年依諸郊廟例五更初便行事今後
請依舊以卯時從之 清泰元年五月中書門下奏據
太常禮院申明宗聖德和武欽孝皇帝今月二十日祔

廟太尉合差宰臣攝行緣馮道在假李愚十八日私忌
在致齋內今劉煦又奏見判三司事煩請免祀事今與
禮官參酌諸私忌日遇大朝會入閣宣召尚赴朝參今
祔饗事大忌屬私齋日請比大朝會宣召例差李愚行
事從之

晉開運三年六月西京留司監祭使奏以祠祭所定行
事官臨日或遇疾病或奉詔赴闕留司吏部郎中一人
主判有關便依次第定名庶無闕事從之 天成三年

十一月太常定唐少帝為昭宣光烈孝皇帝廟號景宗
博士呂朋龜奏謹按禮經臣不誅君稱天以諡之是以
本朝故事命太尉率百僚奉諡冊告天子園丘迴讀于
靈座前並在七月之內諡冊入陵若追尊定諡命太尉
讀諡冊于太廟藏冊于本廟伏以景宗皇帝頃負沈寃
歲月深遠園陵已修不祔于廟則景宗皇帝親在七廟
之外今聖朝申寃追尊定諡重新帝號須撰禮儀又禮
云君不逾年不入宗廟且漢之殤冲質君臣已成晉之

惠懷愍俱負艱難皆不列廟食止祀于園寢臣等切詳故實欲請立景宗皇帝廟于園所命使奉冊書寶綬上諡于廟便奉太牢祀之其四時委守奉薦請下尚書省集三省官詳議施行右散騎常侍蕭希甫等議請依禮院所奏奉勅宜令本州城內選地起廟乃于曹州立廟四年五月中書門下奏先據太常寺定少帝諡昭宣光烈孝皇帝號景宗者伏以景宗生曾為帝饗乃承祧既號景宗合入宗廟如不入宗廟難以言宗于理而論

祧一遠廟安少帝神主于太廟即昭穆序而宗祀正今
或且居別廟即請不言景宗但云昭宣光烈孝皇帝兼
冊文內有基字是玄宗廟諱雖尋常詔勅皆不迴避少
帝是繼世之孫不欲斥烈聖之諱今改基為宗字從之

五代會要風俗通陳孔璋云尊卑有叙喪祭哀敬各有
攸終欲令言著而可遵事施而不犯禮云卒哭之後宰
執木鐸徇于宮曰捨故而諱新故謂毀廟之主也恩遠
屬絕名不可諱今昭宣上去玄宗十四世奏改冊文非
典故也
八月戊申明宗服袞冕御文明殿追冊昭宣光烈

孝皇帝畢冊使兵部尚書盧質押冊出應天門登車

鹵簿鼓吹前導入都停驛翌日登車赴曹州時議者以
追尊則可立之為宗不入太廟深為失禮夫言宗者功
業纂于祖禰德澤被于生民發號申令可也且輝王纂
嗣之日國命出于賊臣君父銜冤母后塗炭遭罹放逐
鼎祚覆亡追諡易名當循故實如漢之冲質晉之閔懷
但尊稱而無廟號前代亡國者周赧漢獻魏陳留亦不
稱宗中興之追諡者孺子嬰光武竟無追宗之典設如
自我作古酌于人情則謂之為景宣光烈深不稱也古

之周景漢景周宣漢宣皆中興再造之主至如國朝太祖曰景皇帝以受命而有唐室宣宗皇帝以隔代承運皇綱復振故也今輝王亡國墜業謂之宣宗得無謬乎先是太常既奏下尚書省集議雖有智者依違不言至是既立為景宗陵號溫陵乃于曹州置廟以時告享仍以本州刺史以下為三獻官後宰臣知其非乃奏去廟號
晉天福四年十一月太常禮院奏議立唐朝引武德年故事祀隋三帝今請立近朝莊宗明宗閔帝三廟

庶合故事詔曰德莫盛于繼絕禮莫重于奉先莊宗立
興復之功明宗垂光大之業逮乎閔帝實繼本枝然則
丕緒洪源皆尊唐室繼周者須崇后稷嗣漢者必奉高
皇將啓嚴祠當崇茂典宜立唐高祖太宗及莊宗明宗
閔帝五廟其月太常禮院又奏唐廟制度請以至德
宮正殿隔為五室三分之南去地四尺以石為埽中容
二主廟之南一屋三門門戟二十有四東西一屋一門
開無祭戟四仲之祭一羊一豕如其中祠幣帛牲牢之

類光祿主之祠祝之文不進不署神厨之具鴻臚督之
五帝五后凡十主未遷者六未立者四未諡者三高宗
太宗與其后暨莊宗明宗凡主在清化里之寢宮祭前
二日以殿中織扇二十迎置新廟以享祀閔皇帝莊宗
明宗二后及魯國孔夫人神主四座請修制祔廟及三
后請定諡法從之

周廣順元年二月太常禮院上言准勅遷漢廟入昇平
宮其唐晉兩朝皆止五廟遷移今漢七廟未審總移為

復移移五廟勅宜准前勅並移于昇平宮其法物神厨
齋院祭服祭器饌料皆依中神例用少牢光祿等寺給
其讀文太祝及奉禮郎太常寺差每仲饗以漢宗子為
三獻從之

舊五代史卷一百四十三攷證

志五禮志下寶應元年 寶應原本訛寶寧考新唐書
寶應係代宗年號無所謂寶寧者今改正

並著具緋衣幘子 緋衣原本作絳衣今據五代會要
改正

天成三年十一月太常定唐少帝為昭宣光烈孝皇帝
四年八月戊申明宗服袞冕御文明殿追冊昭宣光
烈孝皇帝 歐陽史作四年五月乙酉追諡與是志

定謚冊廟月日俱不符

舊五代史卷一百四十三攷證

欽定四庫全書

舊五代史卷一百四十四

宋門下侍郎參知政事監修國史薛居正等撰

志六

樂志上

古之王者理定制禮功成作樂所以昭事天地統和人
神歷代已來舊章斯在洎唐季之亂咸鎬為墟梁運雖
興英莖掃地莊宋起于朔野經始霸圖其所存者不過

邊部鄭聲而已先王雅樂殆將泯絕當同光天成之際
或有事清廟或祈祀泰壇雖冀虞猶施而宮商孰辨遂
使磬裏鼗武入河漢而不歸湯獲舜韶混陵谷而俱失
洎晉高祖奄登大寶思迪前規爰詔有司重興二舞旋
屬烽火為亂明法罔修漢祚幾何無暇制作周顯德五
年冬將立歲仗有司以崇牙樹羽宿設于殿庭世宗因
親臨樂懸試其聲奏見鐘磬之類有設而不擊者訊于
工師皆不能對世宗惻然乃命翰林學士判太常寺事

寶儼參詳其制又命樞密使王朴攷正其聲朴乃用古
累黍之法以審其度造成律準其狀如琴而巨凡設十
三弦以定六律六呂旋相為宮之義世宗善之申命百
官議而行之今亦備紀于後以志五代雅樂沿樂之由
焉

梁開平初太祖受禪始建宗廟凡四室每室有登歌酌
獻之舞

肅祖宣元皇帝室曰大合之舞

敬祖光憲皇帝室曰象功之舞

憲祖昭武皇帝室曰來儀之舞

烈祖文祖皇帝室曰昭德之舞

登歌樂章各一首

五代會要云太常少卿楊煥撰

二年春梁祖將議郊禋有司撰進樂名舞名

樂曰慶和之樂

舞曰崇德之舞

皇帝行奏慶順

奠玉帛登歌奏慶平

迎俎奏慶肅

酌獻奏慶熙

飲福酒奏慶隆

送文舞迎武舞奏慶融

亞獻奏慶和

終獻奏慶休

樂章各一首

太廟迎神舞名開平

皇帝行盥手登歌飲福酒徹豆送神皆奏樂

樂章各一首

唐莊宗光聖神閔孝皇帝廟室酌獻舞武成之舞

登歌樂章一首

五代會要云尚書兵部侍郎崔居儉撰

明宗聖德和武欽孝皇帝廟室酌獻舞雍熙之舞

登歌樂章一首

五代會要云太常卿盧文紀撰

晉高祖聖文章武明德孝皇帝廟室酌獻舞咸和之舞

登歌樂章一首

五代會要云太子賓客判太常寺事趙光輔撰

漢文祖明元皇帝廟室酌獻舞靈長之舞

德祖恭僖皇帝廟室酌獻舞積善之舞

翼祖昭獻皇帝廟室酌獻舞顯仁之舞

顯祖章聖皇帝廟室酌獻舞章慶之舞

登歌樂章各一首

五代會要云太常卿張昭撰

高祖睿文聖武昭肅孝皇帝廟室酌獻舞觀德之舞

登歌章章一首

周信祖睿和皇帝廟室酌獻舞肅雍之舞

僖祖明憲皇帝廟室酌獻舞章德之舞

義祖翼順皇帝廟室酌獻舞善慶之舞

慶祖章肅皇帝廟室酌獻舞觀成之舞

登歌樂章各一首

太祖聖神恭肅文武孝皇帝廟室酌獻舞明德之舞

世宗睿武孝文皇帝廟室酌獻舞定功之舞

登歌樂章各一首

五代會要太祖廟室樂章太
常卿田敏撰世宗廟室樂章

翰林學士判太常寺事竇儼撰樂章詞多不錄

右樂章

晉天福四年十二月禮官奏來歲正旦王公上壽皇帝
舉酒請奏玄同之樂再舉酒奏文同之樂從之五年始
議重興二舞詔曰正冬二節朝會舊儀廢于離亂之時
興自和平之代將期備物全繫用心須議擇人同為定
制其正冬朝會禮節樂章二舞行列等事宜差太常卿
崔稅御史中丞竇貞固刑部侍郎呂琦禮部侍郎張允

與太常寺官一一詳定禮從新意道在舊章庶知治世之和漸見移風之善其年秋稅等具述制度上奏云案禮云天子以德為車以樂為御大樂與天地同和大禮與天地同節又曰安上治人莫善于禮移風易俗莫善于樂故樂書議舞云夫樂在耳曰聲在目曰容聲應乎耳可以聽知容藏于心難以貌覩故聖人假干戚羽旄以表其容發揚蹈厲以見其意聲和合則大樂備矣又案義鏡問鼓吹十二案合于何所答云周禮鼓人掌六

鼓四金漢朝乃有黃門鼓吹崔豹古今注云因張騫使西域得摩訶兜勒一曲李延年增之分為二十八曲梁置鼓吹清商令二人唐又有柷鼓金鉦大鼓長鳴歌簫笳笛合為鼓吹十二案大享會則設于懸外此乃是設二舞及鼓吹十二案之由也今議一從令式排列教習文舞郎六十四人分為八佾每佾八人左手執籥禮云葦籥伊耆氏之樂也周禮有籥師教國子爾雅曰籥如笛三孔而短大者七孔謂之簋歷代已來文舞所用凡

用籥六十有四右手執翟周禮所謂羽舞也書云舞干
羽于兩階翟山雉也以雉羽分析連攢而為之二人執
纛前引數于舞人之外舞人冠進賢冠服黃紗巾單皂
領標白練襪襠白布大口袴革帶烏皮履白布襪武舞
卽六十四人分為八佾左手執干干楯今之旁牌所以
翳身也其色赤中畫獸形故謂之朱干周禮所謂兵舞
取武象用楯六十有四右手執戚斧也上飾以玉故謂
之玉戚二人執旌前引旌似旗而小絳色畫升龍二人

執鼗鼓二人執鐸周禮有四金之奏其三曰金鐸以通
鼓形如大鐸仰而振之金鐸二每鐸二人舉之一人奏
之周禮四金之奏一曰金鐃以和鼓銅鑄為之其色玄
其形圓若權上大下小高三尺六寸有六分圍二尺四
寸上有伏虎之狀旁有耳獸形銜鐸二人執鐃以次之
周禮四金之奏二曰金鈃以上鼓如鈴無舌搖柄以鳴
之二人掌相在左禮云理亂以相制如小鼓用皮為表
實之以糠撫之節樂二人掌雅右右禮云訊疾以雅以

木為之狀如漆筓而掄口大二尺圍長五尺六寸以殺皮輓之旁有二紐髹畫賓醉而出以器築地明行不失節武舞人服弁平巾幘金支緋絲大袖緋絲布襖襠甲金飾白練襜褕錦騰蛇起梁帶豹文大口布袴烏皮靴工人二十數于舞人之外武弁朱襴革帶烏皮履白練襜褕白布襪殿庭仍加鼓吹十二案義鏡云帝設氍毹以氍毹為牀也今請制大牀十二牀容九人振作歌樂具牀為熊羆貔豹騰倚之狀以承之象百獸率舞之意分

置于建鼓之外各三案每案羽葆鼓一大鼓一金鐃一
歌二人簫二人茄二人十二案樂工百有八人舞郎一
百三十有二人取年十五已上弱冠已下容止端正者
其歌曲名號樂章詞句中書條奏差官修撰從之

歐陽
史崔

祝傳高祖詔太常復文武二舞詳定正冬朝會禮及樂
章自唐末之亂禮樂制度亡失已久稅與御史中丞竇
貞固判部侍郎呂琦禮部侍郎張允等草定之其年冬
至高祖會朝崇元殿虔設宮懸二舞在北登歌在上文
舞郎八佾六十有四人冠進賢黃紗袍白中單白練襪
襠白布大口袴革帶履左執籥右秉翟執纛引者二人
武舞郎八佾六十有四人服平巾幘緋絲布大袖繡襦
甲金飾白練襪襠錦騰蛇起梁帶豹文大口袴烏靴左

執千石執戚執旌引者二人加鼓吹十二案負以熊豹以象百獸率舞案諫羽葆鼓一大鼓一金鐸一歌蕭韶各二人王公上壽天子舉爵奏玄同二舉登歌奏文同樂食文舞昭德武舞成功之曲禮畢高祖大悅賜稅金帛羣臣左右都者皆贊歎之然禮樂廢久而制作簡綬又繼以龜茲部電棠法曲參亂雅音其樂工舞郎多教坊伶人百工商賈州縣避役之人又無老師良工教習明年正月旦復奏于庭而登歌發聲悲酸煩慙如蘊露虞殯之音舞者行列進退皆不應節聞者皆悲憤間運二年太常少卿陶穀奏廢二舞

漢高祖受命之年秋九月權太常卿張昭上疏奏改一代樂名其略曰昔周公相成王制禮作樂殿庭徧奏六代舞所謂雲門大咸大韶大夏大濩大武也周室既衰

王不不振諸樂多廢惟大韶大武二曲存焉秦漢已來
名為二舞文舞韶也武舞武也漢時改為文始五行之
舞歷代因而不改貞觀作樂之時祖孝孫改隋文舞為
治康之舞武舞為凱安之舞貞觀中有秦王破陣樂功
成慶善樂二舞樂府又用為二舞是舞有四焉前朝行
用年深不可遽廢俟國家偃伯靈臺即別召工師更其
節奏今改其名具書如左祖孝孫所定二舞名文舞曰
治康之舞請改治安之舞武舞曰凱安之舞請改為振

德之舞貞觀中二舞名文武功成慶善樂前朝名九功
舞請改為觀象之舞秦王破陣樂前朝名為七德舞請
改為講功之舞其治安振德二舞請依舊郊廟行用以
文舞降神武舞送神其觀象講功二舞請依舊宴會行
用又請改十二和樂云昔周朝奏六代之樂即今二舞
之類是也其賓祭常用別有九夏之樂即肆夏皇夏等
是也梁武帝善音樂改九夏為十二雅前朝祖孝孫改
雅為和示不相沿也臣今改和為成取韶樂九成之義

也十二成樂曲名祭天神奏豫和之樂請改為裡成祭
地祇奏順和請改為順成祭宗廟奏永和請改為裕成
祭天地宗廟登歌奏肅和請改為肅成皇帝臨軒奏太
和請改為政成王公出入奏舒和請改為弼成皇帝食
舉及飲宴奏休和請改為德成皇帝受朝皇后入宮奏
正和請改為晨成皇太子軒懸出入奏承和請改為胤
成元日冬至皇帝禮會登歌奏昭和請改為慶成郊廟
俎入奏雍和請改為騂成皇帝祭享酌獻讀祝文及飲

福受胙奏壽和請改為壽成祖孝孫元定十二和曲開
元朝又奏三和遂有十五和之名凡制作禮法動依典
故梁置十二雅蓋取十二天之成數契八音十二律之
變輒益三和有乖稽古又緣祠祭所用不可盡去臣取
其一馬祭孔宣父齊太公廟降神奏宣和請為師雅之
樂三公升殿會訖下階履行奏祴和請廢同用弼成享
先農耕藉奏豐和請廢同用順成已上四舞十二成雅
樂等曲今具錄合用處所及樂章首數一一條例在下

其歌詞文多不錄

舊五代史卷一百四十四

舊五代史卷一百四十四攷證

志六樂志上廟室酌獻舞武成之舞 原本脫成字今

據五代會要增入

以雉羽分析連攢而為之 連攢原本訛運攢今據五

代会要改正

朱襦草帶 襦原本訛構今據五代會要改正

舊五代史卷一百四十四歌謠

欽定四庫全書

舊五代史卷一百四十五

宋門下侍郎參知政事監修國史薛居正等撰

志七

樂志下

周廣順元年太祖初即大位惟新庶政時太常卿邊蔚上疏請改舞名其略云前朝改祖孝孫所定十二成之名文舞曰治安之舞武舞曰振德之舞今請改治安為

政和之舞振德為善勝之舞前朝改貞觀中二舞名文
舞曰觀象之舞武舞曰講功之舞今請改觀象為崇德
之舞講功為象成之舞又議改十二成今改為順十二
順樂曲名祭天神奏禋成請改為昭順之樂祭地祇奏
順成請改為寧順之樂祭宗廟奏裕成請改為肅順之
樂祭天地宗廟登歌奏肅成今請改為感順之樂皇帝
臨軒奏政成請改為治順之樂王公出入奏弼成請改
為忠順之樂皇帝食舉奏德成請改為康順之樂皇帝

受朝皇后入宮奏戾成請改為雍順之樂皇太子軒懸
出入奏膚成請改為溫順之樂元日冬至皇帝禮會登
歌奏慶成請改為禮順之樂郊廟俎入奏駢成請改為
禮順之樂皇帝祭享酌獻讀祝及飲福受胙奏壽成請
改為福順之樂梁武帝改九夏為十二雅以協陽律陰
呂十二管旋宮之義祖孝孫改為十二和開元中乃益
三和前朝去二和改一雅今去雅只用十二順之曲祭
孔宣父齊太公廟降神奏師雅請同用禮順之樂三公

升殿下階履行同用弼成今請同用禮順之樂享藉田

同用寧順之樂曲詞文多不載

五代會要遼蔚請添召樂師令在寺習樂勅太

常寺見管兩京雅樂節級樂工共四十人外更添六十人內三十八人宜抽教坊貼部樂官兼充餘二十二人

宜令本寺照名充填仍令三司定支春冬衣糧月報開奏其舊管四十人亦量添請

世宗顯德元年即位有司上太祖廟室酌獻奏明德之

舞五年六月命中書舍人竇儼參詳太常雅樂十一月

翰林學士竇儼上疏論禮樂刑政之源其一曰請依唐

會要所分門類上自五帝迄于聖朝凡所施為悉命編

次凡關禮樂無有闕漏名之曰大周通禮俾禮院掌之
其三曰伏請命博通之士上自五帝迄于聖朝凡樂章
沿革總次編錄繫于歷代樂錄之後求為定式名之曰
大周正樂俾樂寺掌之依文教習務在齊肅詔曰竇儼
所上封章備陳政要舉當今之急務疾近世之因循器
識可嘉辭理甚當故能立事無愧莅官所請編集大用
通禮大周正樂宜依仍令于內外職官前資前名中選
擇文學之士同共編集具名以聞委儼總領其事所須

紙筆下有司供給六年春正月樞密使王朴奉詔詳定雅樂十二律旋相為宮之法并造律準上之其奏疏略曰夫樂作于人心成聲于物聲氣既和反感于人心者也所假之物大小有數九者成數也是以黃帝吹九寸之管得黃鍾之聲為樂之端也半之清聲也倍之緩聲也三分其一以損益之相生之聲也十二變而復黃鍾之總數也乃命之曰十二律旋迭為均均有七調合八十四調播之于八音著之于歌頌宗周而上率由斯道

自秦而下旋宮聲廢洎東漢雖有太子丞鮑鄴興之人
亡而政息無嗣續之者漢至隋垂十代凡數百年所存
者黃鍾之宮一調而已十二律中惟用七聲其餘五律
謂之啞鐘蓋不用故也唐太宗復古道乃用祖孝孫張
文收攷正雅樂而旋宮八十四調復見于時在懸之器
方無啞者安史之亂京都為墟器之與工十不存一所
用歌奏漸多紕繆逮乎黃巢之餘工器都盡購募不獲
文記亦亡集官詳酌終不知其制度時有太常博士商

盈孫案周官考工記之文鑄鐸鐘十二編鐘二百四十處士蕭承訓校定石磬今之在懸者是也雖有樂器之狀殊無相應之和逮乎宋梁後唐歷晉與漢皆享國不遠未暇及于禮樂以至于十二鐸鐘不問聲律宮商但循環而擊編鐘編磬徒懸而已絲竹匏土僅有七聲作黃鍾之宮一調亦不和備其餘八十三調于是乎泯絕樂之缺壞無甚于今陛下天縱文武奄宅中區思復三代之風臨視樂懸親自考聽知其亡失深動上心乃命

中書舍人竇儼參詳太常樂事不踰月調品八音粗加和會以臣嘗學律歷宣示古今樂錄令臣討論臣雖不敏敢不奉詔遂以周法以秬黍校定尺度長九寸虛徑三分為黃鍾之管與見在黃鍾之聲相應以上下相生之法推之得十二律管以為衆管互吹用聲不便乃作律準十三弦宣聲長九寸張弦各如黃鍾之聲以第八弦六尺設柱為林鍾第三弦八尺設柱為太簇第十弦五尺三寸四分設柱為南呂第五弦七尺一寸三分設

柱為姑洗第十二弦四尺七寸五分設柱為應鍾第七
弦六尺三寸三分設柱為蕤賓第二弦八尺四寸四分
設柱為大呂第九弦五尺六寸三分設柱為夷則第四
弦七尺五寸一分設柱為夾鍾第十一弦五尺一分設
柱為無射第六弦六尺六寸八分設柱為中呂第十三
弦四尺五寸設柱為黃鍾之清聲十二律中旋用七聲
為均為均之主者宮也徵商羽角變宮變徵次焉發其
均主之聲歸乎本音之律七聲迭應而不亂乃成其調

均有七調聲有十二均合八十四調歌奏之曲由之出
焉伏以旋宮之聲久絕一日而補出臣獨見恐未詳悉
望集百官及內外知音者校其得失然後依調制曲八
十四調曲有數百見存者九曲而已皆謂之黃鍾之宮
今詳其音數內三曲即是黃鍾宮聲其餘六曲錯雜諸
調蓋傳習之誤也唐初雖有旋宮之樂至于用曲多與
禮文相違既不敢用唐為則臣又懼學獨力未能備究
古今亦望集多聞知禮文者上本古曲下順常道定其

義理于何月行何禮合用何調何曲聲數長短幾變幾
成議定而制曲方可久長行用所補雅樂旋宮八十四
調并所定尺所吹黃鍾管所作律準謹同上進世宗善
之詔尚書省集百官詳議兵部尚書張昭等議曰昔帝
鴻氏之制樂也將以範圍天地協和人神侯八節之風
聲測四時之正氣器之清濁不可以筆授聲之善否不
可以口傳故鳧氏鑄金伶倫截竹為律呂相生之算宮
商正和之音乃播之于管弦宣之于鐘石然後覆載之

情訢合陰陽之氣和同八風從律而不奸五色成文而不亂空桑孤竹之韻足以禮神雲門大夏之容無虧觀德然月律有旋宮之法備于太師之職經秦滅學雅道陵夷漢初制氏所調惟存鼓舞旋宮十二均更用之法世莫得聞漢元帝時京房善易別音探求古義以周官均法每月更用五音乃立準調旋相為宮成六十調又以日法析為三百六十傳于樂府而編懸復舊律呂無差遭漢中微雅音淪缺京房準法屢有言者事終不成

錢褒空記其名沈重但條其說六十律法寂寥不傳梁武帝素精音律自造四通十二笛以鼓八音又引古五正二變之音旋相為宮得八十四調與律準所調音同數異侯景之亂其音又絕隋朝初定雅樂羣黨沮議歷載不成而沛公鄭譯因龜茲琵琶七音以應月律五正二變七調克諧旋相為宮復為八十四調工人萬寶常又減其絲數稍全古淡隋高祖不重雅樂令儒官集議博士何妥駁奏其鄭萬所奏八十四調竝廢隋氏郊廟

所奏惟黃鍾一均與五郊迎氣雜用蕤賓但七調而已
其餘五鐘懸而不作三朝宴樂用縵樂九部迄于革命
未能改更唐太宗受命舊工祖孝孫張文收整比鄭譯
萬寶常所均七音八十四調方得絲管竝施鐘石俱奏
七始之音復振四廟之韻皆調自安史亂離咸秦盪覆
崇牙樹羽之器掃地無餘戛擊搏拊之工窮年不嗣郊
廟所奏何異南箕波蕩不還知音始絕臣等竊以音之
所起出自人心夔曠不能常泰人亡則音息世亂則樂

崩若不深知禮樂之情安能明制作之本陛下心苞萬
化學富三雍觀兵耀武之功已光鴻業尊祖禮神之致
尤軫皇情乃睠奉常痛淪樂職親閱四懸之器思復九
奏之音爰命廷臣重調鍾律樞密使王朴採京房之準
法練梁武之通音攷鄭譯寶常之七均校孝孫文收之
九變積累黍以審其度聽聲詩以測其情依權衡嘉量
之前文得備數和聲之大旨施于鐘虞足洽蕭韶臣等
今月十九日于太常寺集命太樂令賈峻奏王朴新法

黃鍾調七均音律和諧不相凌越其餘十一管諸調望
依新法教習以備禮寺視用其五郊天地宗廟社稷三
朝大禮合用十二管諸調竝載唐史開元禮近代常行
廣順中太常卿邊蔚奉勅定前件祠祭朝會舞名樂曲
歌詞寺司合有簿籍伏恐所定與新法曲調聲韻不協
請下太常寺檢詳校試如或乖舛請本寺依新法聲調
別撰樂章舞曲令歌者誦習求為一代之法以光六樂
之書世宗覽奏善之乃下詔曰禮樂之重國家所先近

朝已來雅音廢墜雖時運之多故亦官守之因循遂使
擊拊之音空雷梗槩旋相之法莫究指歸樞密使王朴
博識古今懸通律呂討尋舊典撰集新聲定六代之正
音成一朝之盛事其王朴所奏旋宮之法宜依張昭等
議狀行仍令有司依調制曲其間或有疑滯更委王朴
裁酌施行自是雅樂之音稍克諧矣

右雅樂制作

舊五代史卷一百四十五考證

志七樂志下太子丞鮑鄴 鮑鄴原本訛鮑節今據五

代會要及文獻通考改正

十二鐃鍾 鐃鍾原本訛鍾鐃考隋書樂志宮懸各設

十二鐃鍾于其辰位則知鍾鐃之為鐃鍾也今改正

漢初制氏所調 制氏原本訛知氏今據漢書改正

舊五代史卷一百四十五 攷證

欽定四庫全書

史部

舊五代史卷一百

四十六至
五十

詳校官編修臣黃壽齡

洗馬臣王坦修覆勘

總校官編修臣朱鈐

校對官員外郎臣王瓚

謄錄監生臣錢中孝

欽定四庫全書

舊五代史卷一百四十七

宋門下侍郎參知政事監脩國史薛居正等撰

志八

食貨志

案舊史志齊原本
較詳其田賦雜稅

闕佚卷中惟鹽法載之
諸門僅存大畧疑明初

是書已有後闕也
無可採補姑存其舊

梁祖之開國也屬黃巢大亂之後以夷門一鎮外嚴烽

堠內辟汴梁屬以耕桑薄以租賦士雖若戰民則樂輸

二紀之間俄成霸業及末帝與莊宗對壘於河上河南之民雖困于輦運亦未至流亡其義無他蓋賦歛輕而丘園可戀故也及莊宗平定梁室任吏人孔謙為租庸使峻法以剝下厚歛以奉上民產雖竭軍食尚虧加以兵革因之以饑饉不三四年以致顛隕其義無他蓋賦役重而寰區失望故也

案以上見客齋三筆所引薛史繹其文義當係食貨志序

今錄于
卷首

唐同光三年二月勅魏府小菽豆稅每畝減放三升城

內店寺園園比來無稅頃因為命遂有配徵後來以所徵物色添助軍裝衣賜將令通濟宜示矜蠲今據緊慢去處于見輪稅絲上每兩作三等酌量納錢收市軍裝衣賜其絲仍與除放其年閏十二月吏部尚書季琪上言請賦稅不以折納為事一切以本色輸官又不以紐配為名止以正稅加納勅曰本朝徵科惟配有兩稅至于折納當不施為宜依李琪所論應遂稅合納錢物斛斗鹽錢等宜令租庸司指揮並准元徵本色輸納不得

改更若合有移改即須具事由聞奏 天成元年四月

勅應納夏秋稅先有省耗每斗一升今後止納正稅數

不量省耗 四年五月戶部奏三京鄴都諸道州府逐

年所徵夏秋稅租兼鹽麴折徵諸般錢穀起徵各視其

地節候早晚分立期限其月勅百姓今年夏苗委人戶

自通供手狀具頃畝多少五家為保委無隱漏攢連狀

本州具狀送省州縣不得迭差人檢括如人戶隱欺詐

令陳告其田倍令并徵 長興二年六月勅委諸道觀

察使屬縣於每村定有力人戶充村長與村人議有力人戶出剩田苗補貧下不追肯者即具狀徵收有詞者即排段檢括自今年起為定額有經災沴及逐年逋處不在此限三年十二月三司奏請諸道上供稅物充兵士衣賜不足其天下所納斛斗及錢除支贍外請依時折納綾羅絹帛從之

晉天福四年正月勅應諸道節度刺史不得擅加賦稅及於縣邑別立監徵所納田租委人戶自量自槩

周顯德三年十月宣三司指揮諸道州府今後夏稅以
六月一日起徵秋稅至十月一日起徵永為定制 五
年七月賜諸道均田圖十月命左散騎常侍艾穎等三
十四人下諸州檢定民租

周顯德六年春諸道使臣回總計檢到戶二百三十萬
九千八百一十二

唐同光二年度支造請榜示府州縣鎮軍民商旅凡有
買賣並須使八十陌錢 二月詔曰錢者古之泉布蓋

取其流行天下布散人間無積滯則交易通多貯藏則士農困故西漢興改幣之制立告緡之條所以權蓄賈而防大姦也宜令所司散下州府常須檢察不得令富室分外收貯見錢又工人銷鑄為銅器兼沿邊州鎮設法鈐轄勿令商人搬載出境三月知唐州晏駢安奏市肆間點檢錢帛內有錫鑠小錢揀得不少皆是江南綱商挾帶而來詔曰帛布之幣雜以鉛錫惟是江湖之外盜鑄尤多市肆之間公行無畏因是綱商挾帶舟楫往

來換易好錢藏貯富室實為蠹弊須有條流宜令京城諸道於坊市行使錢內點檢雜惡鉛錫錢並宜禁斷沿江州縣每有舟船到岸嚴加覺察不許將雜鉛錫惡錢往來換易好錢如有私載並行收納 天成元年八月

中書門下奏訪聞近日諸道州府所賣器價貴多是銷鎔見錢以邀厚利乃下詔曰宜令遍行曉告如原舊係銅器及碎銅即許鑄造器仍生銅器物每斤價定二百文熟銅器物每斤四百文如違省價買賣之人依盜鑄

錢律文科斷 清泰二年十二月詔御史臺曉告中外
禁用鉛錢如違犯准條流處分

晉天福二年詔禁一切銅器其銅鏡今後官鑄造於東
京置場貨賣許人收買於諸處興販去

周廣順元年三月勅銅法今後官中更不禁斷一任興
販所在一色即不得瀉破為銅器貨賣如有犯者有人
糾告捉獲所犯人不計多少斤兩並處死其地分所由
節級決脊杖十七放隣保人決鬻杖十七放其告事人

給與賞錢一百貫文

江南因唐舊制饒州置永平監歲鑄錢池州永寧監建州永豐監並歲鑄錢杭州置保興監鑄錢

唐同光二年二月詔曰會計之重鹹鹺居先矧彼兩池實有豐利頃自兵戈擾攘民庶流離既場務以隳殘致程課之虧失重茲葺理湏伏規模將立事以成功在從長而就便宜令河中節度使龔王李繼麟兼充制置度安邑解縣兩池榷鹽使便可制一一條貫

五代會要同
光三年二月

初起府每年所徵隨絲鹽錢每兩與減放五文逐年俵賣蠶鹽食鹽大鹽甜次令鹽每斗與減五十樂鹽與減三十夫成元年四月勅諸州府百姓合散蠶鹽今後每年祇二月內一度俵散依夏稅限納錢長興四年五月七日諸道鹽鐵轉運使奏諸道州府鹽法條流元末一槩定奪謹具如後應食顯鹽州府省司各置權糶折博場院應是鄉村並通私商興販所有折博並每年人戶蠶鹽並不許將帶一斤一兩入城侵奪權糶課利如違犯者一兩已上至一斤買賣人各杖六十一斤已上至三斤買賣人各杖七十三斤已上至五斤買賣人各杖八十五斤已上至十斤買賣人各徒二年十斤已上不計多少買賣人各決脊杖二十處死所有犯鹽人隨行錢物驢畜等並納入官所有元本家業莊田如是全家逃走者即行點納仍許般載脚戶經過店主並腳下人力等糾告等第支與優給如知情不告與賣鹽人同罪其犯鹽人經過處地分門司廂界巡檢節級所由并

欽定四庫全書

卷一百四十六

諸色關連人等不專覺察委本州臨時斷訖報省如是
門司關津口鋪捉獲私鹽即依下項等第一半賞錢一
斤以上至十斤支賞錢二十斤五十斤已上至一百斤
支賞錢三十斤一百斤已上支賞錢五十斤應食未
鹽地界州府縣鎮並有推糶場院久來內外禁法即未
一槩條流應刮鹹煎鹽不計多少斤兩竝處極法兼許
四鄰及諸色人等陳告等第支給賞錢欲指揮此後犯
一兩已上至一斤買賣人各杖六十一斤已上至二斤
買賣人各杖七十二斤已上至三斤買賣人各徒一年
三斤已上至五斤買賣人各徒二年五斤已上買賣人
各決脊杖二十處死如是收到鹹土鹽水即委本處煎
鍊鹽數准條科斷或有已曾違犯不至死刑經斷後公
然不懼條流再犯者不計斤兩多少所犯人竝處極法
其有推糶場院員寮節級人力煎鹽池客窰戶般鹽船
綱押綱軍將衙官梢工等具知鹽法如有公然偷盜官
鹽或將貨買其買賣人及渦盤主人知情不告竝依前

項刳鹹例五斤已上處死其諸色開連人等竝合支賞錢即准洛京邢鎮條流事例指揮 顆未青白等鹽元不許界分參雜其顆鹽先許通商之時指揮不得將帶入未鹽地界如有違犯一斤一兩竝處極法所有隨行物色除鹽外一半納官一半與捉事人充賞其餘鹽色未有盡一條流其洛京并鎮定邢州管內多北京未鹽入界捉獲並依洛京條流并斷欲指揮此後但是顆未青白諸色鹽侵界參雜捉獲並准洛京條流施行 一應諸道今後若捉獲犯私鹽麴人罪犯分明正該條法便仰斷遣訖奏若稍涉疑誤祇須申奏取裁

晉天福中河南河北諸州除俵散蠹鹽徵錢外每年未鹽界分場務約糴一十七萬貫有餘言事者稱雖得此錢百姓多犯鹽法請將上件食鹽錢於諸道州府計戶

每戶一貫至二百為五等配之然徒任人逐便興販既不虧官又益百姓朝廷行之諸處場務亦且仍舊俄而鹽貨頓賤去出鹽遠處州縣每斤不過二十文近處不過一十文掌事者又難驟改其法奏請重制鹽場稅蓋欲絕其興販歸利於小官也七年十二月宣旨下三司應有往來鹽貨悉稅之過稅每斤七文住稅每斤十文其諸道州府應有屬州鹽務並令省司差人勾當既而糴鹽雖多而人戶鹽錢又不放免至今民甚苦之

五代會要

晉天福元年十一月敕節文洛京管內逐年所配人戶食鹽起來年每斗減放十文

周廣順元年九月詔改鹽法凡犯五斤已上者處死煎
鹽犯一斤已上者處死先是漢法不記斤兩多少並
處極刑至是始革之三年三月詔曰青白池務素有定
規祇自近年頗乖循守比來青鹽一石抽稅錢八百文
足陌鹽一斗白鹽一石抽稅錢五百文鹽五升其後青
鹽一石抽錢一千鹽一斗訪問更改已來不便商販蕃
人漢戶求利艱難宜與優饒庶令存濟今後每青鹽一

石依舊抽稅錢八百文以八十五為陌鹽一斗白鹽一石抽稅錢五百鹽五升此外更不得別有邀求訪聞邊

上鎮鋪於蕃漢戶市易糶糶衷私有抽稅今後一切止

絕

五代會要周廣順二年九月十八日勅條流禁私鹽翅法如後一諸色犯鹽翅所犯一斤已下至一兩

杖八十配役五斤已下一斤已上徒三年配役五斤已上並決重杖一頓處死一應所犯鹽翅關津門司廂

巡門保如有透漏並行勘斷一刮鱸煎鍊私鹽所犯一斤已下徒三年配役一斤已上並決重杖一頓處死

犯私鹽若捉到鱸水祇煎成鹽秤盤定罪逐處凡有鱸鹵之地所在官吏節級所由常須巡檢村坊鄰保遞相

覺察若有所犯處彰露並行勘斷一所犯私鹽捉事告事人各支賞錢以係省錢充至死刑者賞錢五十千

不及死刑者三十千一顆未鹽各有界分若將本地
分鹽侵越疆界同諸色犯鹽例科斷一鄉村人戶所
請蠶鹽祇得將歸裏置供食不得別將博易貨賣投託
與人如違並同諸色犯鹽例科斷若是所請蠶鹽道路
津濟須經過州府縣鎮委三司明行指揮一凡買鹽
麴並須於官場務內買若衷私投託興販其買賣人並
同諸色犯鹽麴例一諸官場官務如有羨餘出剩鹽
麴並許盡底報官如衷私貨賣者買賣人並同諸色犯
鹽麴科斷若鹽鋪酒店戶及諸色人與場院衷私貨賣
者並同罪科斷一所犯私鹽麴有同情共犯者若是
骨肉卑幼奴婢同犯祇罪家長主首不知情祇罪造意
者餘減等科斷若是他人同犯並同罪斷若與他人同
犯據逐人脚下所犯斤兩依輕重斷遣一州城縣鎮
郭下人戶係屋稅合請鹽者若是州府並於城內請給
若是外縣鎮郭下人戶亦許將鹽歸家供食仰本縣預
取逐戶合請鹽數目攢定文賬部領人戶請拔勒本處

官吏及所在場務同點檢入城若縣城郭下人戶城外別有莊田亦仰本縣預先分擘開坐勿令一處分給供使三年十二月勅諸州府并外縣鎮城內其居人屋稅鹽今後不俵其鹽錢亦不徵納所有鄉村人戶合請鹽鹽所在州城縣鎮嚴切檢校不得放入城門

顯德元年十二月世宗謂侍

臣曰朕覽食末鹽州郡犯私鹽多于顆鹽界分蓋卑濕之地易為刮鹹煎造豈惟違我榷法兼又汚我好鹽況末鹽煎鍊般運費用倍于顆鹽今宜分割十餘州令食

顆鹽不惟輦運省力兼且少人犯禁自是曹宋已西十

餘州皆盡食顆鹽

五代會要顯德二年八月二十四日宣頭節文改立鹽法如後一瞻國

軍堂陽務邢洺州鹽務應有梁梁貯鹽貨處并煎鹽場
竈及應是鹹地並須四面修置塹如是地里遙遠難
為修置塹塹即作壕離為規隔內偷盜夾帶官鹽煎於
壕離外煎造鹽貨便仰收捉及許諸色人陳告所犯不
計多少斤兩並決重杖一頓處死其經歷地分及門司
節級人員並當量罪勘斷所有捉事告事人賞錢二十
千一斤已上至十斤賞錢三十千一斤已上賞錢五
十千 一應有不係官中煎鹽處鹹地並須標識委本
州府差公幹職員與巡監節級村保地主鄰人同共巡
檢若諸色人偷刮鹵地便仰收捉及許人陳告若勘逐
不虛捉事人每獲一人賞絹一十匹獲二人賞絹二十
匹獲三人已上不計人數賞絹五十匹刮鹹煎鹽人并
知情人所犯不計多少斤兩並決重杖一頓處死其刮
鹹處地分並刮鹹人住處巡檢節級所由村保等各徒
二年半令衆一月依舊勾當刮鹹處地主不切檢校徒
二年令衆一月一顆鹽地分界內有人刮鹹煎煉鹽

貨所犯並依前法 一令緣改價賣鹽慮有別界分鹽
貨遞相侵犯及將鹽入城諸色犯鹽人令下三司依下
項條流科斷其犯鹽人隨行物色給與本家其鹽沒納
入官所經歷地分節級人員竝行勘斷一兩至一斤決
臀杖十五令衆半月捉事告事人賞錢五千一斤已上
至一十斤徒一年半令衆一月捉事人賞錢七千十斤
已上不計多少徒二年配發運務役一年捉事告事人
賞錢十千 一諸州府人戶所請蠲鹽不得于鄉村裏
私貨賣及信團頭脚戶縣司請鹽節級所由等尅折糶
賣如有犯者依諸色犯鹽例科斷 一如有人于河東
界將鹽過來及自家界內有人往彼與販鹽貨所犯者
竝處斬其犯鹽人隨行驢畜資財竝與捉事人充賞慶
州青白摧稅院元有透稅條流所有隨行驢畜物色一
半支與捉事人充賞其餘一半并鹽竝納入官欲竝且
依舊一斗已上至三斗杖七十三斗已上至五斗徒一
年五斗已上處死安邑解縣兩池摧鹽院河府節度使

兼判之時申到畫一事件條流等准勅牒兩池所出鹽
舊日若無文榜如擅將一斤一兩准元勅條竝處極法
其犯鹽人應有錢物竝與捉事充賞者切以兩池禁棘
峻阻不通人行四面各置場門弓射分劈鹽池分居住
並在棘園裏面更不別有差遣祇令巡護鹽池如此後
有人偷盜官鹽一斤一兩出池其犯鹽人竝准元勅條
流處分應有隨行錢物竝納入官其捉事人依下項定
支優給若是巡檢弓射池場門子自不專切巡察致有
透漏到棘園外被別人捉獲及有糾告兼同行反告官
中更不坐罪陳告人亦依捉事人支賞應有知情偷盜
官鹽之人亦依犯鹽人一例處斷其不知情闕連人臨
時酌情定罪所有透漏地分弓射及池場門子如是透
漏出鹽一十斤已下徒一年半一十斤已上至二十斤
支賞錢一十斤已下徒一年半一十斤已上至二十斤
支賞錢一十斤已上至一百斤支賞錢三十斤已上至
賞錢五十斤前項所定奪到鹽法條流其應屬州府捉

獲抵犯之人便委本州府檢條沅科斷訖申奏別報省
司其屬省院捉到犯鹽之人干死刑者即勘情罪申上
候省司指揮不至極刑者便委
務司准條流決放訖申報從之
三年十月勅漳河已

北州府界元是官場糴鹽今後除城郭草市內仍舊禁
法其鄉村並許鹽貨通商逐處有鹹鹵之地一任人戶

煎鍊興販則不得踰越漳河入不通高地界

文獻通考
五年既取

江北諸州唐主奉表入貢因白帝以江南無鹵田願得
海陵鹽監南屬以贍軍帝曰海陵在江北難以交居當
別有處分乃詔歲支鹽三十萬
斛以給江南士卒稍稍歸之

周顯德二年正月世宗謂侍臣曰轉輸之物向來皆給

斗耗自晉漢已來不與支破食廩所納新物尚除省耗
況水路所般豈無損折起今後每石宜與耗一斗

後唐天成三年七月詔曰應三京鄴都諸道州府鄉村
人戶自今年七月後於是秋田苗上每畝納麴錢五文
足陌一任百姓自造私麴醞酒供家其錢隨夏秋徵納
其京都及諸道州府縣鎮坊界內應逐年買官麴酒戶
便許自造麴醞酒貨賣仍取天成二年正月至年終一
年逐戶計算都買麴錢數內十分只納二分以充榷酒

錢便從今年七月後管數徵納榷酒戶外其餘諸色人亦許私造酒麴供家即不得衷私賣酒如有故違便即糾察勒依中等酒戶納榷其坊村一任沽賣不在納榷之限時孔循以麴法殺一家于洛陽或獻此意以為愛其人便于國故行之長興元年二月敕書節文諸道州府人戶每秋苗一畝上元徵麴錢五文今後特放二文只徵三文二年詔曰酒醴所重麴蘖是須緣賣價太高禁條頗峻士庶因斯而抵犯刑名由是以滋彰爰行改

草之文庶息煩苛之政各隨苗量定稅錢訪聞數年已
來雖犯法者稀而傷民則甚蓋以亂離日久貧下戶多
纔遇昇平便勤稼穡各務耕田鑿井孰能枕麴藉糟既
隨例以均攤遂抱虛而輸納漸成凋弊深可憫傷况欲
置豐財必除時病有利之事方切施行無名之求尤宜
廢罷但得日新之理何辭夕改之嫌應在京諸道苗畝
上所徵麴錢等便從今年夏竝放其麴官中自造委逐
州減舊價一半于在城撲斷貨買除在城居人不得私

造外鄉村人戶或要供家一任私造勅下之日人甚說之

顯德四年七月詔曰諸道州府麴務今後一依往例官中禁法賣麴逐處先置都務候勅到日竝仰停罷據見在麴數准備貨買兼據年計合使麴數依時踢造候人戶將到價錢據數給麴不得賒賣抑配與人

舊五代史卷一百四十六

舊五代史卷一百四十六攷證

志八食貨志至於折納 折納原本訛折約今据文改正
委人戶自量自槩 槩原本訛槩今据五代會要改正
置場貨賣 置場原本訛置常今据五代會要改正

舊五代史卷一百四十六 政譜

欽定四庫全書

舊五代史卷一百四十七

宋門下侍郎參知政事監脩國史薛居正等撰

志九

刑法志

案刑法志序
原本闕佚

梁太祖開平三年十一月詔太常卿李燕御史蕭頃中
書舍人張衮戶部侍郎崔沂大理卿王鄴刑部郎中崔
誥共刪定律令格式四年十二月宰臣薛貽矩奏太常

卿李燕等重刊定律令三十卷式二十卷格一十卷目錄一十三卷律疏三十卷凡五部一十帙共一百三卷勅中書舍人李仁儉詣閣門奉進伏請目為大梁新定格式律令仍頒下施行從之

原註是時大理卿李保殷進所撰刑律總要十二卷

唐莊宗同光元年十二月御史臺奏當司刑部大理寺本朝法書自朱溫僭逆刪改事條或重貨財輕入人命或自徇枉過濫加刑罰今見在三司收貯刑書並是偽廷刪改者兼偽廷先下諸道追取本朝法書焚燬或經

兵火所遺皆無舊本節目只定州勅庫有本朝法書具
在請勅定州節度使速寫副本進納庶刑法令式並合
本朝舊制從之未幾定州王都進納唐朝格式律令凡
二百八十六卷二年二月刑部尚書盧價奏纂集同光
刑律統類凡一十三卷上之

周太祖廣順元年六月勅侍御史盧億刑部員外郎曹
匪躬大理正段濤同議定重寫法書一百四十八卷先
是漢隱帝末因兵亂法書亡失至是大理奏重寫律令

格式統類編勅凡改點畫及義理之悞字凡二百一十四以晉漢及國初事關刑法勅條凡二十六件分為二

卷附于編勅目為大周續編勅命省寺行用焉

宋史盧億周初

為侍御史漢末兵亂法書亡失至是大理奏重寫律令格式統類編勅乃詔億與刑部員外曹匪躬大理正段濤同加議定舊本以京兆府改同五府開封大名府改同河南府長安萬年改為次赤縣開封浚儀大名元城改為赤縣又定東京諸門薰風等為京城門明德等為皇城門啓運等為宮城門昇龍等為宮門崇元等為殿門廟諱書不成字凡改點畫及義理之悞字二百一十有四又以晉漢及周初事關刑法敕條者分為二卷附編勅目為大周續編勅詔行之

二年二月中書門下奏准元年正月五

日赦書節文今後應犯竊盜賊及和姦者並依晉天福
元年已前條制施行諸處犯罪人等除反逆罪外其餘
罪並不籍沒家產誅及骨肉一依格令處分者請再下
明勅頒示天下乃下詔曰赦書節文明有釐革切慮邊
城遠郡未得審詳宜更申明免至差誤其盜賊若是強
盜並准自來格條斷遣其犯竊盜者計贓絹滿三匹已
上者並集衆決殺其絹以本處上估價為定不滿三匹
者等第決斷應有夫婦人被強姦者男子決殺婦人不

坐其犯和姦者並准律科斷罪不至死其餘姦私罪犯
准格律處分應諸色罪人除謀反大逆外其餘並不得
誅殺骨肉籍沒家產先是晉天福中勅凡和姦者男子
婦人並處極法至是始改從律文焉 世宗顯德四年

五月中書門下奏准宣法書行用多時文意古質條目
繁細使人難會兼前後勅格互換重疊亦難詳定宜令
中書門下並重刪定務從節要所貴天下易為詳究者
伏以刑法者御人之銜勒救弊之斧斤故鞭撻不可一

日弛之于家刑法不可一日廢之于國雖堯舜淳古之
代亦不能舍此而致理矣今奉制旨刪定律令有以見
聖君欽恤明罰勅法之意也竊以律令之書政理之本
經聖賢之損益爲古今之章程歷代以來謂之羈典今
朝廷之所行用者一十二卷律疏三十卷式二十卷令
三十卷開成格一十卷大中統類一十二卷後唐以來
至漢末編勅三十二卷及皇朝制勅等折獄定刑無出
于此律令則文辭古質者覽者難以詳明格勅則條目

繁多檢閱者或有疑誤加之邊遠之地貪猾之徒緣此
爲姦寢以成弊方屬盛明之運宜申畫一之規所冀民
不陷刑吏知所守臣等商量望准聖旨施行仍差侍御
史知雜事張湜太子右庶子劇可久殿中侍御史帥汀
職方郎中鄧守中倉部郎中王瑩司封員外郎賈玘太
常博士趙礪國子博士李光贊大理正蘇曉太子中允
王伸等一十人編集新格勒成部帙律令之有難解者
就文訓釋格勅之有繁雜者隨事刪除止要諧理省文

兼且直書易會其中有輕重未當便于古而不便于今
矛盾相違可于此而不可于彼盡宜改正無或牽拘候
編集畢日委御史臺尚書省四品以上及兩省五品以
上官參詳可否送中書門下議定奏取進止詔從之自
是湜等於都省集議刪定仍令大官供膳五年七月中
書門下奏侍御史知雜事張湜等九人奉詔編集刑書
悉有條貫兵部尚書張昭等一十人參詳旨要更加損
益臣質臣溥據文評議備見精審其所編集者用律為

正辭旨之有難解者釋以䟽意義理之有易了者略其
䟽文式令之有附近者次之格勅之有廢置者又次之
事有不便於該說未盡者別立新條於本條之下其有
文理深古慮人疑惑者別以朱字訓釋至于朝廷之禁
令州縣之常科各以類分悉令編附所冀發函展卷綱
目無遺究本討原刑政咸在其所編集勒成一部別有
目錄凡二十一卷刑名之要盡統於茲目之為大周刑
統欲請頒行天下與律䟽令式通行其刑法統類開成

格編勅等採掇既盡不在法司行使之限自來有宣命
指揮公事及三司臨時條法州縣見今施行不在編集
之數應該京百司公事逐司各有見行條件望令本司
刪集送中書門下詳議聞奏勅宜依仍頒行天下乃賜
侍御史知雜事張滉等九人各銀器二十兩雜綵三十
匹賞刪定刑統之勞也

案以下疑原本有闕佚

唐同光二年六月己巳勅應御史臺河南府行臺馬步
司左右軍巡院見禁囚徒據罪輕重限十日內並湏決

遣申奏仍委四京諸道州府見禁囚徒速宜疏決不得淹停兼恐内外形勢官員私事寄禁切要止絕俾無寬滯三年五月己未在京及諸道州府所禁罪人如無大過速令疏決不得淹滯六月甲寅勅刑以秋冬雖闕惻隱罪多連累翻慮滯淹若或十人之中止爲一夫抵死豈可以輕附重禁錮逾時言念哀矜又難全廢其諸司囚徒罪無輕重並宜各委本司據罪詳斷申奏輕者即時疎理重者候過立春至秋分然後行法如是事繫

軍機須行嚴令或謀惡逆或畜奸邪或行劫殺人難於
留滯並不在此限 天成元年十一月庚申勅應天下
州使繫囚除大辟罪以上委所在長史速推勘決斷不
得傍追證對經過食宿之地除當死刑外並仰釋放兼
不許懲治 二年春左拾遺李同上言天下繫囚請委
長史逐旬親自引問質其罪狀真虛然後論之以法庶
無枉濫從之六月大理少卿王鬱上言凡決極刑合三
覆奏近年以來全不守此伏乞今後前一日令各一覆

奏奉勅宜依八月西京奏奉近勅在京犯極刑者令決
前一日各一覆奏緣當府地遠此後凡有極刑不審准
條疏覆奏奉勅旨昨六月二十日所降勅文祇為應在
洛京有犯極刑者覆奏其諸道已降旨命准舊例施行
今詳西京所奏尚未明近勅兼慮諸道有此疑惑故令
曉諭十月辛丑德音為政之要切在無私聽訟之方唯
期不濫天下諸州官員如有善推疑獄及曾雪冤濫兼
有異政者當具姓名聞奏別加甄獎
長興元年二月

制曰欲通和氣必在伸冤將設公方實資獎善州縣官僚能雪冤獄活人生命者許非時選仍加階超資注官與轉服色已著緋者與轉兼官 二年二月辛亥勅朕猥以眇躬薦承鴻業念彼疲瘵勞於寐興或慮官不得人因成紊亂或慮刑非其罪遂至怨嗟王化所興獄訟為本苟無訓勵必有滯淹近日諸道百姓或諸多違犯或小可鬭爭官吏曲縱胥徒巧求瑕釁初則滋張節目作法拘囚終則誅剝貨財市恩出拔外憑公道內徇私

情無理者轉務遷延有理者却思退縮積成訛弊漸失
紀綱自今後切委逐處官吏州牧縣宰等深體余懷各
舉爾職凡關推究速與剴裁如敢苟縱依違遂成枉濫
或經臺訴屈或投匭伸冤勘問不虛其元推官典並當
責罰其逐處觀察使刺史別議朝典宜令諸道州府各
依此處分所管屬郡委本道嚴切指揮八月丁卯勅三
京諸道州府刑獄近日訪問依前禁繫人多不旋決諸
道宜令所在各委長吏專切推窮不得有滯淹 四月

前濮州錄事叅軍崔琮上言諸道獄囚恐不依法拷掠或不勝苦致斃翻以病聞請置病囚院兼加醫藥中書覆云有罪當刑仰天無恨無病致斃沒地銜冤燃死灰而必在至仁照露盆而須資異鑑書著欽哉之旨禮標例也之文因彰善于泣辜更推恩于扇暘所謂置病囚院望依仍委隨長史專切經心或有病囚當時遣醫人診候治療後據所犯輕重決斷如敢故違致病囚負屈身亡本處官吏並加嚴斷兼每及官至五日一度差人

洗刷枷匣 應順元年二月戊午詔應三京諸道州府
繫囚據罪輕重疾速斷遣比來停滯須奏取裁不便區
分故為留滯今後凡有刑獄據理斷遣如有勅推按理
合奏聞不在此限 清泰元年五月丁丑詔在京諸獄
及天下州府見繫罪人正當暑毒之時未免拘囚之苦
誠知負罪特軫予懷恐法吏生情滯於決斷詔至所在
長吏親自慮問據輕重疾速斷遣無淹滯

晉天福二年八月勅下刑部大理寺御史臺及三京諸

道州府今後或有繫囚染疾者竝令逐處軍醫看候于
公廨錢內量支藥價或事輕者仍許家人候看 四年
九月相州節度使桑維翰奏管內所獲賊人從來籍沒
財產云是鄴都舊例格律未見明文勅今後凡有賊人
准格定罪不得沒納家貲天下諸州准此處分 三月
庚午詳定院奏前守洪洞縣主簿盧燦進策云伏以刑
獄至重朝廷所難尚書省分職六司天下謂之會府且
諸道決獄若關人命即刑部不合不知欲請州府凡斷

大辟罪人訖逐季具有無申報刑部仍具錄案款事節
竝本判官馬步都虞候司法參軍法直官馬步司判官
名銜申聞所貴或有案內情曲不圓刑部可行覆勘如
此則天下遵守法律不敢輕易刑書非唯免有銜冤抑
亦勸其立政者臣等參詳伏以人命至重國法須精雖
載舊章更宜條理誠爲允當望賜施行從之五月詔曰
刑獄之難古今所重但關人命實動天心或有冤冤則
傷和氣應諸道州府凡有囚徒據推勘到案款一一盡

理子細檢律令格勅其間或有疑者准令文獻大理寺亦疑申尚書省省寺明有指歸州府然後決遣 五年

三月丙子詔曰自大中六年已來釐爾稱冤決杖流配訴雖有理不在申明今後據其所陳與為勘斷釐爾之罪准律別科 六年秋七月庚辰詔曰政教所切獄訟惟先推窮須察於事情斷遣必遵於條法用弘欽恤以致和平應三京鄴都及諸道州府見禁諸色人等宜令逐處長史常切提撕疾速決遣每務公當勿使滯淹

天福八年四月壬申勅朕自臨寰宇思致和平以四海
爲家慮有一物失所每念狴牢之內或多枉撓之人屬
此炎蒸倍宜軫憫冀絕滯淹之歎用資欽恤之人應三
京鄴都及諸道州府見禁罪人等宜令逐處長史嚴切
指揮本推司及委本所判官疾速結絕斷遣不得淹延
及致冤濫仍付所司 開運二年五月壬戌殿中丞桑
簡能上封事曰伏以天地育萬物廣博厚之恩帝王牧
黎元行寬大之令是知恤刑緩獄乃爲政之先布德行

惠實愛民之本今盛夏之月農事方殷是雷風長養之時乃動植蕃蕪之際宜順時令以弘至仁竊以諸道州府都郡縣應見禁罪人或有不仁在囹圄稍滯區分胥吏侮文枝蔓乃衆捶楚之下或陷無辜縲絏之中莫能自理苟一人拘繫則數人營財物用既殫工業亦罷若此之類實繁有徒切恐官吏因循寢成斯弊伏乞降詔旨令所在刑獄委長史親自錄問量罪疾速斷遣務絕寬濫勿得淹留庶免虛禁平人妨奪農力冀召和氣以慶

明時勅曰囹圄之中縲紲之苦奸吏苟窮於枝蔓平人
用費於貨財由茲滯淹兼致屈塞桑簡能體茲軫憫專
有敷陳請長史躬親免獄官抑逼深為允當宜再頒行
宜依十月甲子秘書省著作郎邊玕上封事曰臣聞從
諫如流人君之令範極言無隱臣子之常規蓋欲表大
國之任人致萬邦之無事前文備載可舉而行伏以皇
帝陛下德合上玄運膺下武旰食宵衣而軫念好生惡
殺以推仁凡措典刑固無冤枉然以照臨之內州郡尤

多若不再具舉明伏恐漸成奸弊臣竊見諸道刑獄前
朝曾降勅文凡是禁繫罪人五日一度錄問但以年月
稍遠漸致因循或長史事煩不暇躬親點檢或胥徒啓
倖妄要追領證明慮有涉於淫刑即恐傷於和氣伏乞
特降詔勅自今後諸道並委長史五日一度當面同共
錄問所冀處法者無倖銜寬者獲伸俾令四海九州咸
歌聖德五風十雨永致昌期勅曰人之命無以復生國
之刑不可濫舉雖一成之典務在公平而三覆其詞所

宜詳審凡居法吏合究獄情邊圻近陟周行俄陳讜議
更彰欽恤宜允申明 三年十一月丁未左拾遺竇儼
上疏曰臣伏觀名例律疏云死刑者古先哲王則天垂
象本欲生之義期止殺絞斬之坐皆刑之極也又准天
成三年閏八月二十三日勅行極法日宜不舉樂減常
膳又刑部式決重杖一頓處死以代極法斯皆人君哀
矜不捨之道也竊以蚩尤為五虐之科尚行鞭朴漢祖
約三章之法止有死刑絞者筋骨相連斬者頭頸異處

大辟之目不出兩端淫刑所興近聞數等蓋緣外地不
守通規肆率情性或以長釘貫參人手足或以短刀
割人肌膚乃至累朝半生半死俾冤聲而上達致和氣
以有傷將弘守位之仁在峻推行之令欲乞特下明勅
嚴加禁斷者勅曰文物方興刑罰須當有罪宜從於正
法去邪漸契於古風實儼所貢奏章實裨理道宜依所
奏准律令施行

漢乾祐二年正月勅政貴寬易刑尚哀矜慮滋蔓之生

奸實軫傷而是念今屬三元改候四序履端將興和平
無如獄訟應三京鄴都諸道州府見繫罪人委逐處長
史躬親慮問其於決斷務在公平但見其情即為具獄
勿令率引遂致淹停無縱舞文有傷和氣四月甲午勅
曰月屆正陽候當小暑乃挺重出輕之日是恤刑議獄
之辰有罪者速就勘窮薄罰者畫時疏決用符時令勿
縱滯淹三京鄴都諸道州府在獄見繫罪人宜令所司
疾速斷遣無致淹滯枉濫五月辛未勅政化所先獄訟

攸切不唯枉撓兼慮滯淹適當長養之時正屬燄蒸之候累行條貫俾速施行靡不丁寧未曾奏報再頒告諭無或因循應三京鄴都諸道州府詔至宜具疏放已行未行申奏無致逗留

周廣順三年四月乙亥勅朕以時當化育氣屬炎蒸乃思縲紲之人是軫哀矜之念慮其非所案鞫淹延或枉濫窮屈而未得伸宣或饑渴疾病而無所控告以罪當刑者唯彼自召法不可移非理受苦者為上不明安得

無慮欽恤之道夙宵靡寧應諸道州府見繫罪人宜令
官吏疾速推鞠據輕斷遣不得淹滯仍令獄吏洒掃牢
獄當令虛歇洗滌枷械無令蚤虱供給水漿無令饑渴
如有疾患令其家人看承囚人無主官差醫工診候勿
致病亡循典法之成規順長羸之時令俾無淹滯以致
治平又賜諸州詔曰朕以敷政之勤惟刑是重既未能
化人於無罪則不可為上而失刑況時當長羸事貴清
適念圜牆之閉固復桎梏之拘縻處於炎蒸何異焚灼

在州及所屬刑獄見繫罪人卿可躬親錄問省略區分
于入務不行者令務開繫有理須申者速期疎決俾皆
平允無至滯淹又以獄吏逞任情之奸囚人被非法之
苦宜加檢察勿縱侵欺常令淨掃獄房洗刷枷匣知其
饑渴共與水漿有病者聽骨肉看承無主者遣醫工救
療勿令非理致斃以致和氣有傷卿忠幹分憂仁明茫
事必能奉詔體我用心矐委于茲興寐無已餘從勅命
處分 顯德元年十一月帝謂侍臣曰天下所奏獄訟

多追引證甚致淹延有及百餘日而未決者其中有徒黨反告者刼主陳訴者及妄遭牽引者慮獄吏作倖遲留致生人休廢活業朕每念此彌切疚懷此後宜條貫所在藩郡令選明幹寮吏當其訴訟如獄不滯留人無枉撓明具聞奏量與甄獎

內外官當贖之法梁唐皆無定制多示優容或因時分輕重晉天福六年五月尚書刑部員外郎李象請今後凡是散官不計高低若犯罪不得當贖亦不得上請詳

定院覆奏應内外文武官有品官者自從品官法無品
官有散試官者應内外帶職廷臣賓從有功將校等並
請同九品官例其京都運巡使及諸道州府衙前職員
内外雜任鎮將等並請准律不得上請當贖其巡司馬
步雖有曾歷品者亦請同流外職准律杖罪以下決罰
例徒罪以上仍依當贖法至周顯德五年七月新定刑
統今後定罪諸道行軍司馬節度副使副留守准從五
品官例諸道兩使判官防禦團練副使准從六品官例

節度掌書記團判官兩蕃營田等使判官准從七品官
例諸道推巡及軍事判官准從八品官例諸軍將校內
諸司使使副供奉殿直臨時奏聽勅旨由是內外品官
當贖之法始有定制焉

舊五代史卷一百四十七

舊五代史卷一百四十七攷證

志九刑法志統類編敕 統類原本訛統數今据文獻

通考改正

倉部郎中 倉部原本訛減部今據新唐書百官志改

正

前濮州錄事參軍崔琮 崔琮原本作崔琰今据丹府

元龜改正

相州節度使桑維翰 相州原本訛松州今据通鑑改

正

團判官 團判官疑當作團練判官考五代會要亦作

團判官今姑仍其舊

舊五代史卷一百四十七 證

欽定四庫全書

舊五代史卷一百四十八

宋門下侍郎參知政事監修國史薛居正等撰

志十

選舉志

按唐典凡選授之制天官卿掌之所以正權衡而進賢能也凡舉貢之政春官卿掌之所以覈文行而第雋秀也洎梁氏已降皆奉而行之縱或小有釐革亦不出其

軌轍今採其事脩紀于事以志五代官官取士之方也
梁開平元年七月勅近年舉人當秋薦之時不親試者
號為技解今後宜止絕四月兵部尚書權知貢舉姚洎
奏近代設文科選胄子所以綱維名教崇樹邦本也今
在公卿親屬將相子孫有文行可取者請許所在州府
薦送以廣疏材之路從之

文獻通考唐時知貢舉皆用
禮部侍郎梁開平中始命兵

部侍郎楊涉
權知貢舉

唐同光二年十月中書奏請停舉選一年勅舉選二門

國朝之重事但要精確難議權停宜准常例處分 天
成元年八月勅應三京諸道今年貢舉人可依常年取
解仍令隨處量事津送赴闕 五年二月九日勅近年
文士視輕格條就試時疎于帖經登第後恥于赴選宜
絕躁求之路別開獎勸之門其進士科已及第者計選
數年滿日許令就中書陳狀于都堂前各試本業詩賦
判文其中材藝灼然可取者便與除官如或事業不甚
精者自許准添選

晉天福三年三月翰林學士承旨兵部侍郎權知貢舉
崔稅奏臣謬蒙眷渥叩掌文衡實憂庸懦之材不副搜
羅之旨敢不揣摩頑鈍杜絕阿私上則顯陛下求賢次
則使平人得路但以今年就舉比常歲倍多科目之中
亮惡甚衆每駁榜出後則時有喧張不自省循但言屈
塞互相朋扇各出言詞或云主司不公或云試官受賂
實慮上達聖聰微臣無以自明晝省夜思臨深履薄今
臣欲請令舉人落第之後或不甘心任自投狀披陳却

請所試與疏義對證兼令其日一甲同共校量若獨委
試言恐未息詞理倘是實負抑屈則所司固難違憲章
如其妄有陳論則舉人乞痛加懲斷異此際免虛遭謗
議亦將來可久遠施行倘蒙聖造允俞伏乞降勅處分
從之 五年三月詔及第舉人與主司選勝筵宴及中
書舍人鞞鞋接見舉人兼兵部禮部引人過堂之日幕
次酒食會客悉宜廢之四月禮部侍郎張允奏曰明君
側席雖切旁求貢士觀光豈宜濫進竊窺前代未設諸

科始以明經俾升高第自有九經五經之後及三禮三傳已來孝廉之科遂因循而不廢搢紳之士亦緘默而無言以至相承未能改作每歲明經一科少至五百以上多及一千有餘舉人如是繁多試官豈能精當況此等多不究義唯攻帖書文理既不甚通名第豈可妄與且常年登科者不少相次赴選者甚多州縣之間必無遺闕輦轂之下須有稽留怨嗟自此而興謗讟因茲而起但今廣場大啓諸科並存明經者悉色于九經五經

之中無出于三禮三傳之外若無釐革恐未便宜其明
經一科伏請停廢又奏國家懸科待士貴務搜揚實實
求才須除訛濫童子每當就試止在念書背經則雖似
精詳對卷則不能讀誦及名成貢部身返故鄉但尅日
以取官更無心而習業濫蠲徭役虛占官名其童子一
科亦請停廢勅明經童子宏詞拔萃明算道舉百篇等
科並停 七年五月勅應諸色進策人等皆抱才能方
來投獻宜加明試俾盡臧謀起今後應進策條中書奏

覆勅下其進策人委門下省試策三道仍定上中下三等如是元進策內有施行者其所試策或上或中者委門下省給與減選或出身優蝶合格叅選日其試策上者委銓司起壹資注擬其試策中者委銓司依資注擬如是所試策或上或中元進策條並不施行所試策下元進策條內有施行者其本官並仰量與恩賜發遣若或所試策下所進策條並不施行便仰曉示發遣不得再有投進餘並准前後勅文處分 開運元年八月詔

曰明經童子之科前代所設蓋期取士良謂通規爰自
近年暫從停廢損益之機未見牢籠之義全虧將闡斯
文宜依舊貫庶臻至理用廣旁求其明經童子二科今
復置十一月工部尚書權知貢舉竇貞固又奏進士考
誠雜文及與諸科舉人入策歷代以來皆以三條燭盡
為限長興二年改令晝試伏以懸科取士有國常規沿
革之道雖殊公共之情難失若使就試兩廊之下揮毫
短景之中視咎刻而惟畏稽遲演詞藻而難求妍麗未

見觀光之美但同款答之由既非師古之規恐失取之之道今欲考試之時准舊例以條燭為限其進士并諸色舉貢人等有懷藏書冊以入院者舊例扶出不令就試近年以來雖見懷藏多是容縱今欲振舉馳紊明辦臧否莫在必行庶為定式

漢乾祐二年刑部侍郎邊歸謹上言臣竊見每年貢舉人數甚衆動引五舉六舉多至二千三千既事業不精即人文何取請勅三京鄴都諸道州府長官合發諸色

貢舉人文解者並須精加考校事業精研即得解送不得濫有舉送冀塞濫進之門開與能之路勅從之其間條奏未盡處下貢院錄天福五年四月二十七日勅文告諭天下依元勅條件施行如有固違其隨處考試官員當准勅條處分

周廣順二年二月禮部侍郎趙上交奏貢院諸科今欲不試汎義其口義五十道改試墨義十道從之三年正月趙上交奏進士元試詩賦各一首帖經二十帖對

義五通今欲罷帖經對義別試雜文二首試策一道從之其年八月刑部侍郎權知貢舉徐台符奏請別試雜文外其帖經墨義仍依元格從之顯德二年三月禮部侍郎竇儀奏請諸科舉人若合解不解不合解而解者監試官為首罪勒停見任舉送長官奏聞取裁監官如受賂及今後進士如有倩人述作文字應舉者許人言告送本處色役永不進仕

唐同光四年三月中書門下奏議左拾遺王松吏部員

外郎李慎儀上疏以諸道州縣皆是攝官誅剥生靈漸不存濟比者郭崇韜在中書日未詳本朝故事妄被閒人獻疑點檢選曹曲生異議或告赤欠少一事闕違保內一人不來五保即湏並廢文書一紙有誤數任皆不勘詳其年選人及行事官一千二百五十餘員得官者才及數十皆以渝濫為名盡被焚毀棄逐或斃踣於旅店或號哭於道途是以數年已來選人不敢赴集銓曹無人可注中書無人可除去年闕近二千授官不及六

十伏請特降勅文宣布遐邇明往年制置不自於宸衷
此日焦勞特頒於睿澤望以中書條件及王松等所論
事節委銓司點檢務在酌中以為定制從之時議者以
銓注之弊非止一朝搢紳之家自無甄別或有伯叔告
赤鬻於同姓之家隨賂改更因亂昭穆至有季父伯舅
反拜姪甥者郭崇韜疾惡太深奏請釐革豆盧革韋說
僂俛贊成或有親舊訛其兩端者革說曰此郭漢子之
意也及崇韜誅韋說即教門人王松上疏奏論故有此

奏識者非之 天成四年冬十月丙申詔曰本朝一統之時除嶺南黔中去京地遠三年一降選補使號為南選外其餘諸道及京有司諸色選人每年動及數千分為三選尚為繁重近代選人每年不過數百何必以一司公事作三處官方況有格條各依資考兼又明行勅命務絕阿私宜新公共之規俾慎官常之要其諸道選人宜令三銓官員都在省署子細磨勘無違礙後即據格同商量注擬連署申奏仍不得踵前於私第注官如

此則人吏易可整齊公事亦無遲滯 長興元年三月

勅凡是選人皆有資考每至赴調必驗文書或不具全
多稱失墜將明本末湏示規程其判成諸色選人黃甲
下後將歷任文書告赤連粘宜令南曹逐縫使印都於
後面粘紙其前後歷任文書都計多少紙數仍具年月
日判成授某官蓋懼其分假於人故也 其年十月中
書奏吏部流內銓諸色選人先條流試判兩節並委本
官優劣等第申奏文優者宜超一資注擬其次者宜依

資更次者以同類官注擬所以勵援毫之作亦不掩歷
任之勞其或於理道全疎者以人戶少處州縣同類官
中比擬仍准元勅業文者任徵引古今不業文者但據
公理判斷可否不當罪在有司兼諸色選人或有元通
家狀不實鄉里名號將來赴選者並令改正一一豎本
貫屬鄉縣兼無出身一奏一除官等宜並不加選限從
之應順元年正月丁卯中書門下奏準天成二年十
二月勅長定格應經學出身人一任三考許入下縣令

下州錄事參軍亦入中下州錄事參軍兩任四考許入
中下縣令中州錄事參軍兩任六考許入上縣令及緊
州錄事參軍凡為進取皆有因依或少年便受好官或
暮齒不離早任況孤貧舉士或年四十始得經舉及第
八年合選方受一官在任多不成三考第二選漸向蹉
跎有一生終不至令錄者若無改革何以發揚自此經
學出身請一任兩考許入中下縣令下州錄事參軍者
詔曰參選之徒艱辛不一發身遲滯到老卑低宜優未

達之人顯示惟新之澤其經學出身一任兩考元勅入
中下縣令下州錄事叅軍更許入下縣令起今後下州
錄事叅軍一任三考者於人戶多處州縣注擬如於近
勅條內資叙無相當者即準格循資考入官其兩任四
考者準二任五考例入官餘準格條處分

晉天福三年正月詔曰舉選之流苦辛備歷或則耽書
歲久或則守事年深少有違礙格條例是不知式樣今
則方求公器宜被皇恩所有選人等宜令所司除元駁

放及落下事由外如無違礙並與施行仍令所司遍下諸道起今後文解差錯過在發解州府官吏

漢乾祐二年八月右拾遺高守瓊上言仕宦年未三十請不除授縣令因下詔曰起今後諸色選人年七十者宜注優散官年少未歷資考者不得注授令錄其年十二月中書門下奏應諸出選門官并歷任內曾升朝及兩使判官今任却授令錄者並依見任官選數赴集從之

周廣順元年二月詔曰自前朝廷除官銓司選授當其用闕皆稟舊規近聞所得官人或他事阻留或染疾淹駐始赴任者既過月限後之官者遂失期程以至相沿漸成非次是致新官叅謝欲上舊官考秩未終待滿替移動逾時月凋殘一處新舊二官在迎送以為勞必公私之失緒今後應諸道州府錄事叅軍判司縣令主簿等宜令本州府以到任月日旋具申奏及報吏部此後中書及銓司以到任月日用闕永為定制其年十月詔

曰選部公事比置三銓所有員闕選人分在三處每至注擬之際資叙難得相當況今年選人不多宜令三銓公事併為一處委本司長官通判同商量可否施行今當開泰之期宜軫單平之衆自今後合格選人歷任無違礙者並仰吏部南曹判成如文解差錯不合式樣罪在發解官吏

舊五代史卷一百四十八

舊五代史卷一百四十八攷證

志十選舉志疎于帖經 帖經原本作帖括今據五代

會要改正

不試汎義 案原本作不汎試口義今據冊府元龜改

正

王松等所論 王松冊府元龜作王權考文獻通考作

王松是書帝說傳亦作松今仍其舊

舊五代史卷一百四十八攷證